


Piancilna A Bulpi



SABBATH NITAAK

Tu Kaalsung Simding: *Isa. 40:7, 8; Pian. 22:1–13; John 3:16; Mang. 5:5–10; 1 Kor. 15:15–19; Mang. 12:1–9.*

Kamngah: A zingciang in John in ama kianglam manawh a hong pai Zeisu mu a, “En un! Leitung mite mawhna a puakhia Pasion Tuuno!” aci hi. (*John 1:29, ZSV*).

Tu lai hun ciangin Lai Siangtho genkholhna, adiak in Mangmuhna bang a letkhiat uh ciangun, tanglai pek panin Mangmuhna laibu’ a bulpi phawk khalo uhhi. A laigelhpa in Lai Siangtho Lui pen mi khempeuh in thukip ci-in a theihsa uh ahihmah bangin amah’n zong kipsak hi. Mangmuhna kisin laitakin a panpih thei ding munte Lai Siangtho sungah na zonzon ciangin, laibu dangte sangin a thupi zaw thute hongpia thei ding laibu dang khat mah omlai gige hi. Tuapen Piancil laibu mah hipah a, tua sungah hih Leitung mawhna sung ah a tunsuk theihna thute om hi. Mangmuhna thu laigil teng – Lai Siangtho kipatna lamah omkhin dektak phial hi.

Tu kaal sung teng, Mangmuhna laigil a thupi thulian teng sin ding hihang. Tampi tak om ahih manin, tawmkhat teelkhia zaw in, tuateng sungah mihing omzia le Pasion’ omzia, Leitung le eima nuntakna sungah kidona lianpi koibang in om cih, Mangmuhna laibu’ tanglai in a bulpите kisin ding hi.

* *April 12, Sabbath ading kiginkholhna in tukaal lesson sim in.*

“A Kipulaak Masa” Thukhun

Pilna sinna lamah pilna kancianna course nambat kipatna pen “101” hi a, tua course panin a zaizaw le a thukzaw lai in ki sinna ding a kipatna phual ahi hi. Tua mah bangin Lai Siangtho na simsim ciangin, Pasion in zong Piacil laibu sungah kancian na course khat nanei a, Lai Siangtho sung tawtung ah a kikan cian paisuak lai ding course khat mah a na koih cihthu namu theipah ding hi.

Thu taang gen leng, ngaihsutna, limpua masa pen khatpen Lai Siangtho bu kipatna Piacil laibu sungah pulaak masa a – tua ngaihsutna panin theihcianna khat hong piang a, tua a kizatna panin tua thu hong telcian sak semsem ding hi.

Lai Siangtho siamte pawlkhat in hihthu pen “pulaak masak thukham” ci uh a, tua in thukham cih lamsang sangin thukhun aihke’h etteh huai lamah paizaw a, sik tawh a kituam khawng zong hi selo in, tua thukhun sungah a helloh zong thu tampi omlai hi. Tua thukhun hong kidawk khia ding pen, Lai Siangtho le a genkholhna teng kisinna pan hi-a, Pasion in dam takin Atate tungah pulaak zel ding a, a bulpi ngaihsutna tawh kipan sakin, kum le ni hong beibe ciangin hong zai semsem ding hi.

Simin, Isa. 40:7, 8; Mal. 3:6; le Heb. 13:8. Hihmun teng panin genkholhna teng na sinna hong telcian sak zawdeuh ding bang thukhun na mu hiam?

Tu lai khangthakte in “thumaan” pen ut hunhun, deih bang bangin kiseekpeek pahpah ahih manin tua munah “thumaan seek peek” cih kammal zangthei zel uhhi. Bek thamlo a “thumaan” mahmah um phalo ta uhhi.

Pasion in thumaan phut a; a lungsim kikheel lo hi. Amite thumaan hilh kipan a, Lai Siangtho in tua thumaan suut kikkik in, a thukhun le a khatna kikheel ngeilo banah, a khatna tungah khuavak taansuk zawlai hi. Genkholhnate kisin ding hoih mah mah ahih manin, hong kipulaak masa ngaihsutna teng a omna Piacil laibu telcian mahmah ding kizam a, Lai Siangtho mun dang a omlaite telcian behlai nadingin tuateng mah bulphuh pah ding hihang.

Thudang khatpeuh naal mahmah kilawm mahmah phial taleh, a puk ngeilo Lai Siangtho thumaan a thanemsak theiding peuhmah lutsak hetloh ding banghang in thupi nasa hiam? Tuabang in hong thanem sakthei, a pilvang mahmah thute bang teng hithei ding hiam?

Thuciam Tawh Kipawl Itna

Pianpih mawhnei mi hihna cih pen, eima khuamuhna in vannuai leitung pen angsung khaalna kiphatsakna lam tawh muh na ahi hi. Leitung pen pilna picing Pasion muhna tawh hilo eima muhna neucik bektawh mu hihang. “Itna” in a kituak pihlo lak pan mawhnei mi hihna sangin a kituak pihlo zaw thu dang om nawnlo hi. Tulai ngeina laangte in itna cihpen midang tung sangin eima’ deihna picinna hi sakzaw uhhi. Hih angsung bulphuhna in Pasion deihna telhak sakthei ding hi.

Itna’ omzia telcianna in Lai Siangtho genkholhna tel’cian na’ng lam hong honsak hi. Kidona lianpi sunga thubulpi khat zong pen Pasion gamtatzia telkhialhna mah ahi hi. Tua Kidona Lianpi laibu sungah Ellen G. White in “Vannuai leitung buppi siangtho sitset ta hi. Pian’sak nakhempeuh tungah lung kituak takin lungdamna bek omta hi. Piangsakpa tung panin nuntaknale khuavak in ciangtanh omlo takin hong luangsuk hi. A neupen *atom* pan kipan a golpen leitung dong, a tangthei, a tanglo na khempeuh in amau’ hoihna ciat pua in Pasion in itna hicih tangko uhhi” —*The Great Controversy*, p. 678.

Simin, Piansil 22:1–13. Lai Siangtho sunga pulaak masak “itna” pen Piansil 22:2 ah om hi. Hih tangthu in Pasion’ hong itna koibang in pulaak hiam?

Lai Siangtho sungah, hong pulaak masakpen ngaihsutna pen, tuabang ngaihsutna mahbang Lungdamnathu sunga a kipulaak masapen ngaihsutna pen mah ahi hi. Lungdamnathu Matt. 3:17; Mark 1:11; Luke 3:22 le John 3:16 sungtengah pulaak masakpen “itna” om hi.

Gentehna in, (*John 3:16*) sunga “*itna*” in khuavak taangpen hi: biakna tau tunga Isaac tangthu a hemgen bang hiliang hi. Abraham in Pasion a muanzia pen, amah’n biakna piak thuak hi taleh Pasion in a tapa thokik sakthei ding cih um tin’ten lel hi (*Heb. 11:19*). Mihing tungah Pasion’ itna hong lahkholhna ahi hi. Ei hong it dan pen “A Tapa neihsun nangawn hongpia” (*Pian. 22:2, 12, 16*) liang a, sihna pan in thokik sak hi. Pasion in eite a dingin hong kipiakkhiatna tawh itna honglak hi.

Pasion in kipiakkhiatna itna nei cih midang tungah koibang in lakkhia thei ding ihi hiam?

Isaac' Dotna: Tuuno Koi-ah Om Hiam?

Lai Siangtho in Tuuno (*Hebrew: seh*) a pulaak masakna mun pen itna pulaak masakna mun mah, Piancil 22 ahi hi. Tuuno cihpen Mangmuhna sunga limpua a tampen in om tawntung a Zeisu pen Tuuno a cihna 20 vei tungsiahi ahi hi. Mangmuhna 4 le 5 sung a thupi mahmah khat – John in Pasion' tokhom omna munah a vahawhna munah, Tuuno in inntekpipa nahi hi.

Simin, Pian. 22:7, 8; Pai. 12:3–13; le Mang. 5:5–10. Isaac pen sagawh biakna in a kipiak dektakna in tuunote bangci limpua in kizang cih hong tel'ciansak hiam? John in Mangmuhna 5 sunga amuh thu tawh koibang in kihenkop hiam?

Lai Siangtho in Tuuno (*Hebrew: seh*) a pulaak masakna pen Isaac' dotna: Tuuno koi-ah om hiam? (*Pian. 22:7*) cih ahi hi. Lai Siangtho mundang khempeuh in tua dotna dawng ngeingai uh hi. Lai Siangtho Lui a bu dang 38 in zong tua Isaac' dotna mah dawn theih dawn mawh in dawng uh a, Paisan pawu zeh teng pankipan David' nasep nate zong kihel hi. A tangthu buppi sungah Messiah thu genkholhna vive himahleh, Isaac' dotna a kidawnnavive ahi hi. Lai Siangtho Thak in zong, Zeisu cilesa sisan tawh hongpai in Amite sungah nasem in singlamteh tungah Ama'nuntakna hong kipiakna tawh tua dotna mah hong dawng hi.

Tua mah bangin, Lungdamnathu in Tuuno a pulaak masakna pen John 1:29-34 hi. Tua hi-a, Tuiphumpa John in Isaac' dotna a dawng bang hipah a, tua sangin a hun lemwaw dang zong omthei tuan nawnlo hi. Mawhneite in kisikna tawh Zeisu' sihna limpua in kituiphum uh a, tualai panin nuntakna thak hong kipan ta hi. Tua tawh kizui in, Pasion' Tuuno Zeisu, cih Matthai sungan hong kipulaak a, van kihong in: “Hihpen Ka it Ka Tapa hi-a, Ama' tungah Ka lungkim mahmah hi” (*Matt. 3:17*) cih. Topa' Vanmi' aw khat in van panin tuabang in hong pulaakna in Abraham le Isaac buaina teng veng'sak pah hi (*Pian. 22:11–14*).

Tua khau khempeuh gaan'khawm peuh lecin, eimah hong aiawh sak Zeisu, Pasion' Tuuno cih kitel'cian mahmah pahleh hi.

Zeisu in eimah hong aiawhna in hotkhiatna ading tawphah ahihna banghang in kithei thei hiam? Thukhenna maiah eimah hong aiawh ding Amah omkei lelleh bang lam-etna peuh kinei thei ding naci hiam?

Sihna Tawh Kisai

A gilo pen leitung a tenkhakna zong Piangsakpa tawh hong khen khiatna hi a, ahun lem peuhpeuh ciangin hong do dingin sihna in hong bukna ahi hi. Tua in “mawhna thaman” hi-a, vannaui buppi nuntakna bulpi: Piangsakpa tawh kizop lohnadaan ahi hi. Tua in Lai Siangtho genkholhna sungah mapangpi hipah a, a ven'theih nadingin Zeisu, Ama' sihna le a thawhkikna bekin vengsak thei hi. Lai Siangtho in a pulaak masakpen sihna thu le sihna in hih genkholhna tungah khuavak bulpi hong tang sak a, mawhna in hong huupna hong tel'sak a, tua thu a vengsak ding Pasion' nasepna hong telcian sak hi.

Simin, Pian. 2:15–17; Pian. 4:8–15; 1 Kor. 15:15–19; le Mang. 1:18. Hih munteng ah—sihna'thu le sihna a omteng in—mihing bang hangin si cih honghilh, Pasion in sihna koici muh, tua buaina koi bang in hong vengsak ding ci hiam?

Eite'n “sihna pen nuntakna' khenkhat hi” kici hi. Zuaupi hi. Sihna in nuntakna tawh kilehbulh in, nungta saklo a: hiteng ah mapang nawnlo dingin hong buluhpa ahi hi. Sihna pen kingeina seh ahihitei' hang, phukha taktak leng lungsim in nakpi takin ki langdo a, mipi in zong lungkim zawhlohna kinei tek hi. Na a kisa mahmah sihna, a lipkhap huai mahmah sihna zong om a, ta no sihsuahna bangte ahi hi. Mi a tamzaw in nulepa in tate' mai- ah si masa ding cihpen leitung ngeina bangin kisangsiam mah mah lel hi.

Sihna masa pen Lai Siangtho ciaptehna pen lam-et ngeina tawh hong kilehbulh hi. Adam le Eve te' nupa in, amau' sihna un, mawh neilo a tapa neu uhpen a ginalo a u pa in thatlum ahih manin, sihna a dip kuathuai zia tuakkha uhhi. Tua in thu tangelo tawh sihna thuakna ahi hi.

Zeisu lungngai leng, Abel mah bangin migilo in migi that hi. Khazih' sihna sangin a thutang lozaw bang dang omthei ding hiam? Abel sihna le singlamteh tungah Khazih' sihna sungah a kizawitawn bang thu dang omthei lai ding hiam? Abel' sihna omzia tungtawn in, Zeisu in “sihna' gam tawhtang” nei-a, Ama' sung ah Pasion in eite bang hong pailai cih hong theisak hiam?

Sihna buaina a veng masiah, kimawk nuntak hi ding a, khiat na neilo galmat banghang in ki hithei ding hiam? Hihthu in Zeisu hong hihsak thute hangin eite a ding bangzah lungdam huai sak ci hiam?

Gulpi

Biakna kituhna pen Mangmuhna thu bulpi ahi hi. Zuaa khem pa in ngeina hoihlo khat hong thun a “gulpi” (*Mang. 13:2–4*) kici hi. A puk vanmi hih gulpi pen theihloh kal in hong omvat hilo hi. Tua in Eden huan hong phawksak kik a, gulpi in Adamle Eve te’ paradise ah hong lut in, ama’ nungzuihna tawh Piangsakpa langdo ding in hong zol hi.

Enkaakin, Pian. 3:1–5 le Mang. 12:1–9. A thu bulpuh tuak uh bang ahi diam? Piansil sunga gulpi’ hong lutcilna tangthu, Mangmuhna sunga om vantung gal kidona tawh kisai koici bang hiam?

Satan in leitung bup lampial sakna tangthu nih Lai Siangtho sungah om hi. Piansil sungah mihing nihbek a omlai in: Mang. 12 le 13 sunga Satan pen “leitung bup a khempa” (*Mang. 12:9*) akicah lai in, sapi tungah vangliatna guanin, “leitung bup” (*Mang. 12:9*) in biasak hi. Lai Siangtho genkholhna sunga a kikhel ngei lo pianzia khatpen Kidona Lianpi mah ahi hi.

Hamphatna khat, kidona lianpi omzia kikhel ngeilo ahihlam, kamsangte laibu sung mahah teci kician nei ihih manin, Khristiante in asia apha khentel siam uh a, khalam tuktheihna’ng thaang omna phawk thei pah hi. Pasion in Amahmah hidending a, dawi in dawi mah hong hi veve lai ding hi. Satan in ahihleh kimelseelsa tul tampi silh ding a, ahihhang, Mangmuhna sunga omsa bangin, Eden huan sunga a zatsa khemna tengmah lam pial hetlo in hong zangh ding hi. Pasion in pilna khentel theihna hong kamciam khin (*James 1:5*) a, Lai Siangtho kammalgavan in pua leng, dawi hong khemna ah kipuk khalo ding hi. Dahhuai thu khatah, mi tampi tukkhin zo a, a tamzaw mah tukzellai ding hi.

Ngeinate kikheel zelzel cihphawk in. Kipawlnate kilaih zel hi; khatvei san theihsa thute sang theilo hikikzel hi. Kidona lianpi a bulpi le a thute kikheel ngeilo hi. Khristiante in tua akikheel nate koibangte ngaihsut huai thei hiam? Dawimang pa zuaa bulpi ahi – si taktak kei niteh, pasiante bang nahi ding hi—cihte tuni nomau ngeina sungah koibang in omthei hiam?

Ngaihsutbeh Ding: Ellen G. White, “The Revelation,” pp. 578–581, in *The Acts of the Apostles*, simin.

Leitung biakna tampi in sandan vive zang uh a; Khristian biakna sandan ahiehleh, tangthu thupiang tungah kipkho mahmah hi. Lai Siangtho pen mihing’ tangthu sungah Pasion le mihing mapan khopna hi-a, tua bangin kum tulsim in mapan khopna pan, Pasion’ omzia kipkho cihthu kitel thei hi.

Khat veivei, Khristiante in hih thute zak ding nangawn cim tak liang uhhi. Eima kamsang thupuak peuh mipi lakah a kihilh ciangin, i zaksak sa peuh hi-e, thuthak zong omsam kei-e kici hi.

Eima thupuak in kipkho a kikhel ngeilo cihte hang, thu neucik aihke’h tona omlo cihna hi tuanlo hi. Tua tawh kilehbulh in: Pasion’ thupiakna khat kisin ding ciangin pilna picing Pasion in hongpiak zekai ahieh manin, tua thu atawp dongin tun zolo ding cih kithei hi.

Ellen G. White in Mangmuhna laibu pen khang tawntung in Khristiante belh thei siksian ahi ding tangthu thupuak in kigelh hi cihhi. E. G. White hunlai a “Pasion nasem khangno pawlkhat in hih thumaan teng bekbek ahilh den uh cimtak uhhi. Thuthak a lamdang deuh ahi dingin upna thak liklek khawng hong lutpih sawm uhhi” —*The Acts of the Apostles*, p. 580. Hihthu tawh kisai in, mailam thupiang ding ciangbek hilo in; a piang khinsa tang thute zong ahieh manin, agen masa peuh hihnopna *cele* nopna peuh tawh lampial lo in, Lai Siangtho tangthu sungah upna zung khak ding kism hi.

Kikupding Dotnate:

① Lai Siangtho in thuthak le pilna thak hongpia khial ngei nailo hi. Eima san’sa thumante lenkipsa in thuthak theih nop na koi bangin kemcing siam ding ihi hiam?

② Genkholhnate letkhiatna thak a omleh pawlpi in koibang in dawngkikding hiam? Sinbeh ding tampi omlai cihte hang, tua khuavak thak pen thu phamawh maw, a siahuai thu laang pak maw cih koibang in khentel thei ding ihi hiam?

③ Galpi nihna lai in Pacific tuipei tung khualzin khat in, a laitah madeuh in, a siavuan pa kiangah “Keipen tagah hipeuh ing. Ka sihkhith ciangin kua’n hong phawk nawn ding hiam?” ci in kiko hi. Siavuanpa in “Ke’n hong phawk tawn tung ning” ci in dawng hi. Siavuanpa’ dawonna khum mah mah napi a sawtlo in amah le a kiphawkkhakna si lel hi. Hih leitung ah nuntakna pen, sihna hong tung peuhleh, koibang khiatna nei mello suakthei ding hiam?

Bawngnawi Thupiang Lamdang

Thupuak:- ANDREW MCCHESENEY

Nupi nu, bazaar pan hong ciah ciang-in huang sungah bawng peuhmah na om lo hi. Amah zong huang sung veel hi. Bawng omlo, naupang nihte' innsung pan amah a na ngak ding lam tuanu in thei hi. Amah zong, khitui mual kai hi. A bawng uh a ki guok lam koi ci gen ding ahiam? Bawngpi om kei leh amau pen si ding uh hi.

Nupi nu zong a tate' kiangah gen sawm lo hi. Ama khitui zong musak nuamlo hi. Sawlbawk te po na lam-ah va pai-in a lungsim Pasion' kiangah suah khia hi. Pasion kiangah a pasal pen SDA pastor hi-a Sabbath a tan' man-in Tajikistan gam-ah kum 8 thongkia hi ci-in suahkhia hi. Bawngnawi zuakna tawh aneek ding uh lei thei a, tu'n a ki guok sak manin Pasion tungah lungdam ko hi.

Kap kawm sa-in "Tu'n bang hong piang lai ding hiam? Kei leh ka tate koi ci nuntaak ding hiam? Ci hi. Amah zong kap kawm-in thungen-a sawlbawk a et leh a hiang-ah a awk khat mu hi. A va et leh sum lom khat na hi hi. "Bawng dang khat lei theih nading sum nong piak man-in lungdam ing ci-in" Pasion kiangah lungdam ko hi.

Amah zong a khitui' nul in bawng lei ding-in bazaar ah pai hi. Azuak te'n lah a neihzah sang tam deihzaw uh hi. A tawpna teh papi khat in na phal hi. "Na neihzah tawh hong phal ing" na ci hi.

Tua bawng pen bazaar ah a gawng, a khem pen hi. Nupi nu zong sum pia-in hong ciah pih hi. "Pasion aw, hih bawng pen na khut sungah hong koi ing" ci hi.

Nupi nu'n an limtak pia-in, a tate nih in na kimawl pih hi. Itna tawh akhoi man-un hong khang-in a sawtlo-in a neih masak bang sangin bawngnawi a zahnih ngah hi.

Liubov Brunton – tangthu sung-a nupinu' tua nu in "Pasion in ka haksat hun-in hong huai hi" ci hi. Amah'n bawngnawi thupiang lamdang in Pasion in a nasem te a tuahtuah na mun leh thu ah kem hi cih hong phawk sak hi, ci hi. Liubov' pi in thu lamdang dangte hong gen lai ding hi. Mai kaal teh simin.



Leitung mun citeng ah lungdamna thu kizelh nadingin mission sumpite na khat man un kilungdam mahmah hi.

Khen I: A Huamin Etna

Thubulphuh: *John 1:29*

Lungngaih Ding: *Pian. 22:1-18; John 3:16.*

Lai Siangtho ah bu masa pen Piansil bu sungah hotkhiatna le genkhohlhna thu dapphah pite om hi. Lim le meel a neilo pan Pasion in nuntakna hong pian'sakna (*Piansil 1 le 2*) pan, thusia pan Pasion in hotkhiatna a piangsakna, Joseph' tangthu dong ah (*Piansil 50:20*), Pasion' tatkhiatna thu kigen hi. Tua ii a laizang ah Isaac kihenna thu om-a (*Piansil 22:1-18*) Pasion geelna hong bulphuh hi.

Tu kaal lesson sungah *Akedah* (Isaac kihenna) tangthu pan Pasion' hotkhiatna thu geelna te en ding hi hang. Et masak ding pen ah "itna" hi. Itna pan in adang Pasion gamtat khiat te hong ka hi. Isaac tangthu ah Hebrew kammal "*ahab*, itna" pen Lai Siangtho ah kizang masa pen-a pa' itna lahna in Pasion' kampau hi (*Pian. 22:2*).

Akedah thu ah etding anihna pen a tapa a piakna tawh Pasion' itna lahkhiatna hi, tua pen Isaac tungtang ah tuuno tawh a lak hi (*Pian. 22:7-10*). Athumna pen Pasion in a itna honglak takpiit na hi, adiak in-ah kigal neihna ah khaici pen gulpi tawh kigal ding-a a tawpna ah khaici in dawi le sihna na zo ding hi. Hih thu pen lamet loh tuatal hong dawknawh kidawk sak-a (*Pian. 22:13*) tua in hun nunung-a mawh khuhna ni-a a piang ding thu ciing khol hi.

Khen II: Hilhciaanna

Pasion' itna

Pasion' itna pen "zai, sau, thuk, san Khazih hong itna a kithei khin zolo" (*Eph 3:18, 19*) ahih manin telding piang theilo hi. Verb ahi "*ahab*, itna" pen Lai Siangtho ah pa' itna alak dingin – Abraham in khat bek a neih Isaac a itna (*Pian. 22:2*) a masa pen-in hong dawkhi. Hih takah Abraham in a ta a itna pen Pasion koici it zawh hiam cih sittel na hongsuak hi (*Pian. 22:1 le Pian. 22:12 saikaak in*).

Hih takah Abraham in Pasion a it zia a kisit lahkhiat ding bek hilo hi. Abraham' tangthu ah Pasion' itna pen Abraham tungah zong kilak hi. Tua hang-in Abraham in Pasion' itna a thukdan tel hi. Ellen G. White in "Abraham in lungdamna thu atel nading-in Pasion in a tapa ngen hi. A phuutkhak na panin Pasion in mihingte hotkhiat nading a sepna ah bangzah tak piakhia hiam cih atel nading-in tua ci thuak sak hi... *ciangtan neilo Pasion veina, itna hih kan-in lahtheih theihding bang om hiam?*"—*Patriarchs and Prophets*, p.154.

Pasian in a itna a lahna-in Abraham tungah mihing thupilna, kha thu pilna, lungsim thupil nate na zanglo hi. Abraham thuakzawh na tan tawh Pasian' thuakna telsak hi. Abraham in a it mahmah aneih sunsun "tapa" le Pasian in a neihsun a it a tapa "Pa in tapa it" (*John 5:20*) a kibatna John in a kibang kammal mah na zang hi: "itna" thu a telkhehna ah "Pasian in leitung mite hong it mahmah ahilh manin ama Tapa a um mi khempeuh si nawnloin a hin' tawntung theihna dingun a Tapa neihsun a hong piak dongin a hong itna a hong lak hi." (*John 3:16; 1 John 4:9 saikaak in*).

Pasian' Tuuno

"Pasian' Tuuno" cih pen John in Zeisu a gen na hi- "A zing ciangin John in ama kiangah Zeisu hongpai amuh ciangin, "En un!, leitung mawhna a lakhia Pasian' Tuuno hih lai-ah hongpai hi!" (*John 1:29; John 1:36 tawh saikaak in*). "Tuuno" cihpen "haltum biakpiak nading-in" (*Pian. 22:7*) Lai Siangtho ah Isaac tangthu ah hong dawk masakna pen lungluut huai mahmah hi. Ahilh hangin hihmun lian bek pan-in tuuno pen haltum biakpiak nading-in a kizat masak hun hilo hi. Abel in haltum biakpiakna piakhin hi (*Pian. 4:4; Gam.18:17 tawh saikaak in*). Tuuno cih "seh" kammal a dawk masakna mun hi. Hebrew Lai Siangtho sungah *seh* a kici tuuno pen kician takin hih mun bekah na zang hi. Abu dante ah a kician-in zanglo hi. Hih dan- a a tuamdang na in a tuamdang deuh a khatna nei hi. Isaac (Abraham tawh) pen a tuamdang tuuno a kawh hi-in nadante sang- in siangtho zaw hi.

John in lungdamna thubu sungah "tuuno" a zatna in (*John 1:29, 36*), Mangmuhna sungah (23 vei) a zat phat diakna in Isaac' dotna, "tuuno koi-ah om ahi hiam?" (*Pian. 22:7*), a cinuam nahi hi. Lai Siangtho khat le khat zat kibatna in Isaac' tuuno a ci nuam nahi hi. Tuuno in Pasian' Tapa kawh hi cih John in natel khin hi. Hih thu Abraham in Isaac a dawn' kikna ah kidawh hi "Pasian in haltum biakpiak nading tuuno hongpia ding hi" (*Pian. 22:8*).

Piancil 22:8 sung-a Abraham' kampau ah thu om hi. A khatna ah, Hebru laigelh ngeina ah "verb" pai masa-in "subject" in nung zuih hi. Hih Lai Siantho mun ah "Pasian" pen verb mai-ah hong pai masak na in Pasian sungbek ah vaihawm sakna om cih gennop na hi. Pasian in vaihawm sak ding hi. Anihna ah Piancil 22:8 ah "pai" a kici kammal "*lek leka*" om in Pasian' sapna lak hi (*Pian. 22:2; Pian. 12:1 tawh saikaak in*). Tua ahilh manin Piancil 22:8 pen hihdan

in kilet thei hi: “Pasian-in amahmah tuuno hong hi ding hi” cih nopna ah Pasian in tuuno dingin amahmah hong kipia ding cihna hi. Tua thu hangin tuuno pen Pasian hi ci-in kiseh hi. Tua hang-in hih takah Pasian mahmah nahi hi.

Pasian’ Gualzawh na

Pasian in tuuno hong puak ding dan in Isaac in na lamén hi. Tua dan na hilo-in tuutal pen hong dawkwaw hi. “Tua ciangin Abraham khuadak kawikawi a, khaumang lakah a ki-a a awk tuutal khat a nungah na om hi. Abraham pai-in tua tuutal kai a, ama tapa' tangin meihal biakna--in a pia hi. (*Pian. 22:13*). Tuutal hong dawkna in mawh khuhna ni-a tuu hong dawkwaw na kawkwaw hi (*Siam 16:3, 6*). Isaac kipiakkhiatna thu le mawhkhuhna ni thu agen Lai Siangtho munte kizopna om hi. Isaac kihenna pen mawhkhuhna thu tawh kizopna a neihdan Lai Siangtho mun dangte sang-in kinai zaw hi. I muh theih kammalte pen- *olah*, “haltum biakpiakna” (*Pian. 22:13; Siam. 16:3, 5 tawh saikaak in*), *ra’ah*, “kilang” (*Pian. 22:14; Siam. 16:2 tawh saikaak in*), *yiqqakh* “la” (*Pian. 22:13; Siam. 16:5 tawh saikaak in*). Hih Lai Siangtho mun nihte ah kammal kibatna in Siampi Laibu 16 na a gelhpa in Isaac kipiakna thu a lungsim sungah teeng hiding hi.

Alang khat pan in-ah Isaac kihenna thu in hun nunung ah mawh khuhna ni thu a gen Daniel 8 ah zong kidawkwaw hi. Daniel’ mangmuh na ah laigual masa pen- “Tua ciang-in ka ettöhleh tuutal” mu hi (*Dan. 8:3*)— Isaac’ tangthu agendan na hi-in Daniel in Piansil 22:13 a kammal la hi kicithei hi. Isaac’ kipiakna thu Siampi 16 le Daniel 8 te in thapiak beh hi (tua mun nihte ah *ra’ah*, “mu” a na cih khawmhi phadiak hi). Daniel 8 lam pan en lehang *Akedah* tangthu pen hun nunung-a mawhkhuhna thu kawkwaw hich telthei hi hang.

Hih khuavaanbup thu in *Akedah* tangthu (*Pian. 22:17*) a khup Pasian’ thupha aomlam kipsak hi. Pasian’ khap thupha pen Abraham suante’ ading bek hilo-in minam dangte ading zong hi veve hi. Topa in Abraham suante in “agalte kulh kongpi a luah ding uh hi” ci hi. Hih kamciam in gulpi tung le sihna tungah Khazih a gualzawh ding lam Piansil 3:15 a genkholhna kawkwaw hi. Isaac kihenna thu in hun nunung-a mawhkhuhna hun-a Pasian’ mite ading mawhkhuh sakna thu kawkwaw hi (*Dan. 8:14 tawh saikaak in*). Hih thugil Hebru laikhak bu sungah om-a, *Akedah* ii thukham (*Hebru 6:14*) pen Siampi lian pen Pa in mawh khuhna ni hun sung-in “kideina” puan tawh kideina

nunglam ah (*Heb. 6:19; Siam. 16:2,15 tawh saikaak in*) aluutna thu dong huam hi.

Khen III: Nuntakna-ah Zatpah Ding

Piencil 22:6-8 sung-a Abraham le Isaac te’ kihona simin. Khalam khantoh nading bang honghilh hiam?

Pian 22:6 “Anih un api khawm uh hi” Hih laigual nihvei dawk hi (*Pian. 22:6, 8*), dahna om hi, a pata-un kiholo-in apai lam lim’gen mah mah hi.

“Isaac in kapa aw ci hi” (*Pian. 22:7*). Isaac in a pau masak na ah Hebru kam’ *abi*, “ka pa aw” na ci-in amah a that ding Abraham tawh a kinai dan honglak hi.

“Tua ciangin Abraham in “ka tapa aw, hiah om ing” ci hi” (*Pian. 22:7*). “Ka tapa” (*Beni*) pen “ka pa aw” (*abi*) tawh kizawi tawn hi. Thah ding geelna a om hangin pa in a tapa it-a a neihsun a tapa a hi na a liatna zui-in thuakna zong nasia hi (*John 5:20 tawh saikaak in*).

“Isaac in” Mei le sing om a, Haltum Biakpiak nading tuuno koi ah om ahi hiam?” ci hi (*Pian. 22:7*). Hih dotna pen “Kei pen tuuno ka hiam?” a cilo bek mah hi.

Ciaptehding:
